

36202

文

762

912

1

部



中国国家图书馆
NATIONAL LIBRARY OF CHINA

九峯淡士著

師市市
身市市
身市市
身市市

次廣曾銓署品



中国国家图书馆
NATIONAL LIBRARY OF CHINA

辛酉孟秋
出月校印

師竹廬聯話序

宋楊守齋先生云作詩難填詞尤難殊不知詩有古體今體之別詞有小調中調長調之分格律可考而求也腔譜可按而得也或專集或選刻幾於汗牛充棟擇善而從者莫不步亦步趨亦趨矣至於楹聯則長短隨心無格律腔譜之可言又無專集選刻之可師近世坊間所刻之臨池一助簡而不精對聯滙海燕而寡要且不敘其緣起附以品題而聯之旨不見惟梁茵鄰中丞之楹聯叢話獨闢見解無微不達得之者珍若貢璧然八十年前之佳製風行海內而八十年後之名作如林湮沒無聞豈非憾事雖間有一二留意聯話者錄之哀然成帙而限於見聞之不廣苦於傳述之



中国国家图书馆
NATIONAL LIBRARY OF CHINA

失真掛一而漏萬得此而失彼因之意慵心灰未遑卒業者比比皆是 叔英先生昌之受業師也少遭離亂手不釋卷卽有志於通經致用之學乃屢困名場應鄉闈十三度堂備三次不獲售僅得秉鐸江浦時時以忠信篤敬勉諸生本其平昔所得力於唐宋諸大家者以爲講授江邑學風爲之一變其後寄情山水徧遊江浙諸名勝得助江山發爲詩文一吐其邁往不羣之氣間以餘趣臨摹古帖古畫書則出入蘇米畫則力追子久草書尤神似右軍造請者戶限爲穿每書楹聯自出新語不襲陳言因仿梁中丞叢話之體搜集數十年來見聞所及上自名公巨卿下逮騷人逸士凡有佳聯悉皆採錄洵足繼軌前作蔚爲大觀今吾 師年七十

有五矣而耳目聰強步履從容望之如神仙中人昔年刊小綠天庵文稿兩卷詩鈔四卷詞鈔一卷師竹廬隨筆兩卷國朝書畫錄四卷又附刊一卷今復輯成師竹廬聯話十二卷其門類一曰名勝二曰園林三曰祠廟上四曰祠廟下五曰學校六曰廨宇七曰庵院八曰會館九曰佳話十曰輓詞十一曰格言十二曰雜綴出私資付劬孳孳不已務期興起國粹加惠儒林宜天錫之以壽而康也他日者奇偶相生翻學士風雲之句新陳遞變增名園翰墨之光將於是編乎覘之

歲次辛酉秋八月朔 門人胡介昌茲僑氏拜手謹序於西麓草堂之南窗

師竹廬聯話卷一

錫山拙翁寶鎮編輯

名勝

泰山秀甲寰區好遊者往往以不獲登臨爲憾彭雪琴宮保玉麈
登泰岱集成語撰聯云我本楚狂人五嶽尋仙不辭遠地猶鄆氏
邑萬方多難此登臨氣象萬千洵堪俯視一切浙江處州青田縣
舊隸温州其地有石門洞洞口有天然石門華亭沈某過此徘徊
瞻眺題似洞非洞適成仙洞無門有門是爲佛門於洞邊石上令
手民鐫之相傳此地昔年劉青田讀書處也

湖北黃州重建雪堂供宋蘇文忠軾清胡文忠林翼二公位於其



中逾十餘年余友汪葆素茂才橐筆遊鄂暇日輒至雪堂瞻玩撰
偶語懸於楹曰今古近千年元豐咸豐曠世相感江山環一室眉
陽益陽易地皆然合肥江潤生太史雲龍爲阮文達公孫瑁羈旅
揚州題平山堂楹帖云披繡闥俯雕甍其西南諸峯林壑尤美送
夕陽迎素月當春夏之交草木際天善於寫景用成語若己出
江甯府之妙相菴故屈子祠也陶文毅公澍有碑紀其顛末園中
因山爲樓鑿石爲亭種四時花木頗多勝景別建精室數椽臨水
開窗幽敞無匹額曰得少佳趣聯云四百八蕭寺繁華都付與無
情煙雨三十六洞天縹緲我於此小憩林泉係僧人月潭所撰書
法亦蒼勁有致蛟川城臨大海所屬之招寶山橫截海口山頂有

招寶寺紺宇琳宮香火稱盛吾鄉杜文山明經友房游其地作七
字聯云風雨百靈朝梵刹乾坤一柱奠巖疆殊有力量

小孤山在大江中單椒壁立銳下豐上如置石盤盎中碧蘿紅葉
秋景尤麗湖南某孝廉兩過之書聯曰有美一人中夜聞五銖環
珮遺世獨立下游俯兩點金焦時人詫爲此山之絕唱湖北黃鶴
樓湖南岳陽樓爲大湖南北巨觀而聯語無甚動人者某孝廉過
鄂渚集古詩題曰大江流日夜西北有高樓後至岳州又撰聯云
對此茫茫百端集斯老惓惓天下憂於三醉亭亦題一聯句云一
月二十九日醉百年三萬六千場一時傳誦以爲合作

大明湖爲濟南名勝一望皆柳隄藕蕩鵲華山倒映波心前有滙



前修處聯語 卷一
泉寺爲游人讌集之地劉金門先生題聯語云四面荷花三面柳
一城山色半城湖莫愁湖爲金陵名勝臨水屋宇閎敞其上有勝
棋樓可覽全湖煙雨祀明徐中山王及盧莫愁兩像經癸丑之變
樓宇毀壞庚午歲改建竣工時曾文正總督兩江撰楹帖云興廢
無常一番功業一棋局湖山有主半屬英雄半美人意有寄託迨
文正薨紳士添懸其像於堂焉

徐宗幹爲南通州第一人任浙閩總督署理將軍兼福建布政司
使又兼福建學政一時政治軍權財賦學士均在權衡勲位赫隆
世無其匹幼年登琅山題聯云長嘯一聲山鳴谷應舉頭四顧海
濶天空不凡之器具可見焉吾邑黃埠墩一名小金山楹聯雖多
佳者絕少惟孫郭兩聯最佳孫文靖公爾準有燈火春星浮北郭
雲霞朝景接西神之句郭遠堂中丞相蔭有如臨揚子大江聽塔
上金鈴自語定有蘇公高致看山門玉帶重留之句一渾成一切
定小金山有氣勢

台州之有東湖猶杭州之有西湖也出東郭門不過半里湖光山
色與西湖無異隔以長隄分裏外湖其外湖有湖心亭傑閣三層
登臨最勝俞蔭甫編修撰楹帖曰好水好山出東郭不半里而至
宜晴宜雨比西湖第一樓何如頗自然洞天門在浙江靈巖其洞
南北相通軒廠如廈廣五丈深二十餘丈洞上下左右壁皆砥平
無窾突若神功斲削成者內有聯云靈峯峭拔疑無路巖谷幽深



別有天四川駱殿撰成驥遊西湖過平湖秋月作偶語云穿牖而
來夏日清風冬日日捲簾相見前山明月後山山亦工巧

江西贛州塔影龕金君楚清撰偶語云何處著此身彈指現空中
樓閣會當凌絕頂昂頭吸天上星辰極有氣勢德陽西三十里有
石亭秋月古跡爲縣內八景之一石亭之側有古井每屆中秋節
夜月朗井底都人士咸於是夕觀玩之彭君大俠題聯云天氣晚
來秋東邊日頭西邊雨夜色涼如水北斗闌干南斗斜蓋集唐人
詩句也鎮江東來閣亦名勝也任某有聯曰檻前一帶滄江不古
不今圖畫簾外數聲啼鳥非絲非竹笙歌又彭剛直題一聯曰騰
島白浮空月湧江流閒鶴夢象山青入座潮來窗外有龍吟均切
而多趣有東昇樓亦在鎮江岸邊彭剛直留題楹帖云風露滿江
秋萬頃晴波潑星斗雲霞出海曙九霄瑞靄曜乾坤集句毫不牽
強曲阜孔君祥麟登多景樓眺望因感甲子事忽成聯語云北國
暫停驂縱我雙眸看無邊風月東瀛方用武問誰隻手扶第一江
山有氣勢徐致祥學使由四川赴浙江紆道游金山留一聯云適
從山水窟中來秋色可人征袂猶沾巫峽雨欲向海雲深處住郵
程催我扁舟又趁浙江潮縷述來往行程詞意切合

金陵城西有小湖早因莫愁著名其旁有勝棋樓相傳徐中山王
與明太祖奕棋而勝卽以此湖賜之樓懸楹帖云占全湖滌水芙
蕖勝國君臣棋一局看終古雕梁玳瑁家庭院燕雙棲上下聯



俱切同治間新修正荷花盛開懸中山王盧莫愁兩像逾數年增
懸曾文正公像焉彭雪琴宮保題有山色慣迎逃世客水聲常送
渡溪僧之句長沙羅君庶丹題有管領湖山屬兒女平分樓閣坐
王侯之句湘潭黎君福昌撰偶語云我獨攜半卷離騷借秋水一
湖來把牢愁盡浣君試讀六朝樂府有美人絕代要偕名士爭傳
韓某作聯曰江山再劫收拾殘棋好憑湖影花光盡洗餘氛見林
壑樓閣周遮低徊靈跡中有美人名將平分片席到煙波又徐某
撰聯曰說甚麼英雄自古迄今這一箇湖名偏屬兒女幸留得我
輩探幽選勝看六朝山色來上樓臺聞秦州王子實太史曾作偶
語懸於堂柱曰恨我晚來遊只落得萬柄枯荷一湖秋水問誰能
不朽除非是六朝兒女千古英雄以上數聯俱極渾成

虎丘爲吳中第一名勝春秋佳日中外士女游覽者遂爲之塞李
文忠祠建於山麓某年祠宇落成其上新添崇樓傑閣曲榭雕闌
遠近連亙數里從此吟眺之地更多吳縣吳靖瀾題長聯云崇祠
壯輪奐儘當年紆紫拖金春夢一場都付斜陽流水除眞孃墓問
誰爲摩挲碑碣憑弔幽魂豔迹話南朝偏賺得名士美人樽酒頻
澆青草塚小劫歷滄桑賸今日頽垣敗井蘇臺片壤幻成海市蜃
樓出闔閩城又添了熱鬧鶯花撐持香國俊游懷北里知定有畫
船簫鼓醉歌來訪白公隄曲折暢達亦是才人之筆

鎮江焦山有所謂四面佛者爲山之最高峰揚州方君地山題聯

曰面面相窺佛也須有靠背高高在上人到此卽回頭此處鑿山窟
壁爲四佛像雕鏤尤絕精揚州平山堂夙稱名勝堂之西有第五
泉水味濃厚其南有梅數十本爲歐公讀書處李郁華有一徑入
煙寺衆香聞妙天及雲中辨江樹花裏弄春禽之聯某君撰楹帖
云好纒勝遊來白髮催人莫把韶光輕擲去不知征戍苦青山向
我無多塊壘已刪平實理實情南京周孝侯臺懸偶句云大屋不
畫龍蛇待名士來題詠者今世復多蛟虎願將軍出斬除之秦淮
風月亭有聯云絮雪撲簾榴花氣酒香楊柳旗亭春擲笛麴塵生
浦激衫歌袖舞煙波畫舫晚鳴榔句亦尙儻惜不知作者姓名

鎮江金山塔聳峙雲霄丁君紹周題聯曰我輩復登臨舊業已隨
爭戰盡江山留勝跡天風常送海潮來集句頗自然鎮江北固山
石颿樓相傳蘇東坡有聯云雲涌樓臺出天上風搖鐘磬落人間
其附近有祭江亭舊懸客心洗流水盪胸生層雲之聯但所撰之
人未詳湖北宜昌有三游洞旌德呂某撰偶句鐫於石上云巴蜀
荆楚之間奇哉有此元白蘇黃而外游者爲誰是蓋因元微之退
之兄弟與白香山遊此故名蘇子瞻兄弟與黃山谷亦曾來遊相
傳爲後三游孫君家穀里居未詳於此亦有聯云勝蹟說三游自
從玉局題詩問何人壓倒元白雄圖共一覽誰把金沙畫界於此
地控住蠻荆江西百花洲亦頗著名有人撰聯曰有此湖山得此
佳趣召以煙景假以文章江西滕王閣懸有聯云時維九月序屬

三秋落霞與孤鶩齊飛秋水共長天一色上出重霄下臨無地捲
蠻荆而引颶越襟三江而帶五湖此王齊仙所集句也

湖北黃鶴樓彭雪琴宮保撰楹帖云星斗摘寒芒古今誰具摩天
手乾坤流浩氣霄漢常懸捧日心高視濶步恰稱其人抱蜀居士
有黃鶴去來無定所白雲今古擁高樓之聯又某君有太白無詩
獨留千古恨長安不見更上一層樓之聯新化周芍衫作偶語曰
君騎黃鶴去俯玉宇瓊樓難拋却千古棋枰萬家燈火我泛斗槎
來攜謝筒畫稿再收拾湖邊風月漢上煙花後又作一聯句云瓢
飲長江一吞六七千里笛橫大別三弄十二萬言石門袁少枚撰
偶句云我比青蓮來更遲仍許登樓眺江漢誰知黃鶴去太早空
聽吹笛落梅花以上俱能貼切聞此處復有聯曰闌干外滾滾波
濤任千古英雄挽不住大江東去窗戶間堂堂日月儘四時憑眺
幾曾見黃鶴西來氣勢頗佳但未知何人所著

安徽安慶大觀亭祀余忠宣公雄壯甲於皖江懷遠宮農山撰聯
曰萬古乾坤此江水千家山郭靜朝暉集句簡括某君有楹帖云
石聳亭高看天邊雲樹蒼茫無非樂土湖平岸濶問江上舟帆來
往那是閒人頗侗儻吾邑出城外西南十里許有五里湖爲吾邑
之名勝地明高忠憲公於湖畔作居名曰水居讀書靜坐其中二
十餘年其自題書室聯云得閒且閒今日莫思明日事當做就做
一年可作百年人梁山舟學士有游目騁懷流水今日脩身體道



我思占人之聯秦凌滄侍郎有塵慮蠲除鳥語花香天浩蕩道心
透露水流雲在月空明之聯山東竇東臯御史撰楹帖曰與顧涇
陽馬素修先後主盟閩洛淵源大振斯文墜緒惟歸季思吳子往
始終交契湖山嘯詠時留知己清譚孫旭三茂才著偶句云理窟
造精微由龜山一脈而來高也明也悠也久也名區占幽勝有筇
澤四圍相繞藏焉修焉息焉游焉嚴笑拈茂才聯曰道宗伊洛學
宗閩一脈淵源承先啟後山似屏風湖似鏡四時煙月適性陶情
張以亨學師聯云圖畫自天開如此湖山不負名賢排几席樓臺
臨水起無邊風月豈容凡輩入門牆殷遺浦學師偶語云萬物付
澄觀體道研幾恰好值月到天心風來水面四時耽靜坐忘言得
意正妙在雲收雨腳霞亘山頭裘某有聯云後左徒二千年謫宦
歸來聊尋漁父濯纓樂接太湖三萬頃涼波浩渺曾照孤臣戀闕
心以上句均耐人尋味

金陵江甯縣西有駐馬坡相傳諸葛武侯曾駐馬山麓故名山半
有武侯祠薛慰農先生主講惜陰書院時鳩資葺之煥然一新劉
君忠誠撰楹帖云許先帝馳驅東連吳會有儒者氣象上繼伊周
馮君煦題聯曰駐馬此重經莫問渠天發殘碑臨砌斷闕臥龍如
可作願爲我剪除他族開濟清時立武湖在江甯縣北周三十餘
里盡植荷芰三面皆水非舟楫不能通曾文正督兩江時築一土
隄以便遊人隄旁爲湖神廟面湖而建足攬全湖之勝薛慰農山



長作偶語云三百年方策猶存賸鼻渚鷗汀時有雲煙入圖畫四
十里昆明依舊聽菱歌漁唱不須鼓角演樓船玄武湖又名練湖
南朝於此講武明季置黃冊庫於洲上設官守之故薛聯云然
金陵清涼山掃葉樓爲清初託迹僧龔半千舊居卽龔氏半畝園
內懸掃葉僧像江甯陳作霖作跋語云龔賢號野遺上元人能詩
工畫蘭明季亂遊四方晚年歸金陵築半畝園於清涼山自號半
千高隱不仕自繪像如僧狀名其居曰掃葉樓近爲心悟上人居
住端甸齋爲上人書楹聯云不殊風景猶如昨獨立蒼茫自詠詩
張君通謨撰偶語云古寺話齊梁大好江山來振錫餘情寄詩畫
想當風雨快揮毫某君有欲窮千里目來看六朝山之聯楊寶壬
有半千掃葉樓千古六一畫蘭詩一囊之聯易君順鼎於此題楹
帖曰老不白頭因水好冬猶赤脚爲師高蓋此山有還陽井泉井
旁居民飲此泉雖老無一白頭者又上人曾居廬山九峯寺其徒
年六十雖冬月亦赤脚歲己酉易君與友人夢湘遊此山上人出
紙索書因撰此聯以應之

蘇州滄浪亭郭遠堂中丞柏蔭撰楹帖云漁笛好同聽羨諸君判
牘餘閒清興南樓追庾亮塵纓聊一濯擬明日刺船竟去遙情滄
海契成連虞山東麓讀書臺有聯云五六月間無暑氣百千年後
有書聲相傳臺爲梁昭明太子讀書處高丈餘中庾太子石像背
臨深泉水冷而碧又有洗墨池瘦竹千竿風來颯颯成韻登其臺



塵襟爲之盡滌温州樂清縣玉虹洞某君題聯曰高處不勝寒玉
宇瓊樓開洞府山中何所有白雲紅樹住仙家

安徽太平金柱塔最上一層有所謂南天門北天門者某君題偶
句云趨步來南天門北天門一塔橫江中流砥柱放眼去東梁山
西梁山雙峯排闥半壁屏籬武陟山在六安城西二十五里昔漢
武帝南巡曾登此山故名有程孝廉聯云我輩復登臨河山極目
風景生悲直將把酒問天拔劍斫地漢王今安在野卉縈眸流泉
聒耳想像旌旂耀日管籥喧雲

浙江金華府八詠樓卽宋沈休文之元暢樓三面可供遠眺懸有
齊梁風月留高詠吳越江山極大觀一聯是吾友徐子敬孝廉所
著又有聯云才智縱橫慨末路英雄尺素自書千古恨風煙牢落
攬前溪蒼翠夕陽如畫六朝山係長白繼良撰府城隍廟後有明
月樓高可望遠樓下石柱聯曰更樓上一層望羊石仙蹤龍湫勝
蹟當月明千里訪邵太常記梁學士碑羊石指黃初平叱石成羊
處龍湫指雙龍洞

浙江瑞安飛雲閣供瑞安詩人木主孫渠田題偶語云清新開府
俊逸參軍香火共一堂每當月夕風晨結習未忘定有吟聲空際
落白水東城青山北郭漁樵分半席遙想天容海色衰年多病恨
無眼福望中收王小牧有聯云大好光景小築幽樓懷舊寄深思
獨慨白傅龕成黃公墟邈曠代名流同堂晤對論詩猶餘事也當

追踪七子嗣響四靈閣爲黃漱蘭侍郎體芳建未竣工而侍郎逝館
故上聯云然又永嘉自宋有四靈詩自成一派清初有七子吟社
亦名擅一時

震澤一名太湖其南湖州嘉興等界稍北則吳江蘇州更北則宜
興無錫焉所謂汪洋三萬六千頃也吾錫湖濱有一巨石直瞰湖
中如鼉頭然因呼爲鼉頭渚余擬集孫大宗伯繼臯詠鼉頭渚五
律詩中天浮一鼉出山狹萬龍趨爲聯語鐫於石上忽已三十年
遲遲未果近由楊君翰西等於東邊山麓建橫雲小築迤北一亭
頗擅勝概並闢爲植果場亭懸楹帖云招三兩漁樵春夏秋冬良
夜攬萬千氣象雨煙風雪斜陽又偶語云橫雲分疊嶂落日澹平
湖此某君集句也

揚州小金山江都徐理菴撰楹帖云仍從水竹開軒免辜負十里
春風二分明月偶向湖山放櫂好領畧紅橋烟雨白塔雲霞山麓
有月觀陳臯卿題聯云今月古月皓魄一輪把酒問青天好悟滄
桑小劫長橋短橋畫欄六曲移舟泊烟渚可堪風柳多情又劉滄
年集詞作聯云好句屬吾曹幾度閒吟正綠翦烟蕪紅吹雲樹恐
闌剛落日千年此地有泉名第五花種無雙揚州產芍藥最有名
第五泉在平山堂下

浙江西湖退省盦王湘綺撰偶語曰花柳野亭開居士身閒來放
鶴湖山行處好聖朝恩重莫騎驢冷泉亭有聯曰不愁泉冷無時



熱常恐峯來更欲飛謝方山題三潭印月迎翠軒聯云客中客入
畫中畫樓外樓看山外山儀徵時蓬仙先生慶萊題烟霞洞聯云
地連石壁雙峯起天占錢塘一角多西湖川上亭俞陸雲作楹帖
云雲思霞想疑三島花影湖光會一亭西湖俞樓懸楹聯云諸子
羣經評議兩吳門浙水寓廬三樓爲曲園先生所建友人多贈以
詩此乃先生摘錄贈句書以爲聯蓋先生著述以兩評議爲最大
而蘇州有西園杭州有俞樓有右台仙館皆其寓廬

南朝金粉自古流傳而秦淮畫舫尤擅盛名薛慰農山長題楊氏
停艇聽水閣聯云六朝金粉十里笙歌裙屐昔年遊最難忘北海

豪情西園雅集九曲清波一簾夢影樓臺依舊好且消受東山絲
竹南部煙花撰句頗有風人之致所爲墨客騷人胸中另具邱壑
者也清涼山掃葉樓一望盡勝景安化李爽和撰偶語云帶甲滿
天地詞賦動江關惟戰士文人到此偏多千古恨煙波渺何處齊
魯青未了祇湖光山色而今猶是六朝時徐淮生作聯云登樓始
悟浮生夢久坐惟聞落葉聲湘潭楊哲子題楹句云每因憑眺傷
時局獨倚江山念古人亦有氣勢

鎮江多景樓康南海作柱上聯曰江淘日夜東流水地聳英雄北
固樓附近有文殊閣林紹年撰楹帖曰人間歲月如流水鏡裏雲
山似畫屏林君又題四字聯曰江山如畫魚鳥親人會君煥於石
肯堂作偶語云水清石白焦公之宅紙帳山蔬彌勒同龕上二句

集米襄陽銘下二句集蘇玉局詞吳君家勝於東昇樓題聯云紅
透雲霞看日上青連天地覺潮來鎮江北固山有塔其旁有亭懸
聯云爲孫劉三分遺跡徑將北府招來人事幾回紅亭白塔皆
古變蕭梁六字嘉名仍把南朝送去我聞一笑綠水青山無恙不
係丹徒趙曾望手筆

浙江雁蕩天柱峯有聯云真奇哉一百二十峯造化小兒無端弄
巧可惜了三萬六千日白頭老叟幾箇曾遊秀水縣南二里鴛鴦
湖一名南湖彭雪琴宮保玉麈題聯云移得蓬瀛來世上別有天
地非人間松江謝希傳來遊撰楹帖云溯五季迄今幾閱滄桑傑
構重新無恙煙波猶澹蕩指百里以內交通輪軌游蹤戾止儘多
裙屐此登臨其旁有來鶴亭蔣君汝藻作偶語云踞鷲嶺傍桃源
對芝塢小築茅亭是林巒最幽處曲江濤吳山雪西湖月生成畫
本極宇宙之大觀

吾邑西南鄉管社山麓建築萬頃堂憑欄眺望頓豁胸襟春秋佳
日遊人絡繹不絕孫叔方孝廉撰楹帖云簫鼓迎神百道風帆來
管社詠觴脩禊幾人墨妙寫蘭亭秦岐農明經題偶句云眼前圖
畫新開大箕山小箕山列岫晴湖不數癡翁留妙筆世外仙源誰
是東管社西管社結廬翠麓可有漁郎來問津許靜山觀察題楹
聯曰山水儘倚異世同心此間近接紫淵宅風塵方瀕洞問天
搔首吾老已過絳縣人陸耀星大令士奎作偶語云如上岳陽樓

對萬頃湖光重憶希文椽筆遙瞻於越界指一帆風影可來范蠡館
扁舟王克循茂才勅撰聯曰洗盡舊胸襟一水平鋪千頃白拓開
新眼界萬山合抱數峯青毘陵胡某擬成偶語而未鐫板懸於堂
句云淘浪何年美人駿馬有餘思此山不語雲水天風豁古愁第
二句因堂右有古項王廟而言也

杭州北高峯下雲林寺卽靈隱風景奇妙別有天地真名勝也御
筆題楹帖云禪心澄水月法鼓聚魚龍湖山春社在岳王祠西南
有御題聯曰花枝入戶朝含潤泉水侵偕夜有聲湖心亭居全湖
中心四面臨水雕欄外花柳掩映上爲層樓登樓眺望羣山環立
如屏亭懸聯曰波湧湖光遠山環樹色涼亦御筆湖北晴川閣遊
覽最宜柱懸偶句云赤壁龍蛇循軌道青春鸚鵡起樓臺係張文
襄公之洞所題

江西南昌府滕王閣有聯云大江東去爽氣西來簡括渾成洵爲
佳對福建甌江中有小島屹立江心曰孤嶼風景宛似金山昔宋
高宗南渡曾駐蹕於此嶼中有浩然樓或云孟襄陽曾遊此故名
懸楹帖云青山橫郭白水遶城孤嶼大江雙塔院初日芙蓉曉風
楊柳一樓千古兩詩人上聯切景下聯紀事也又戴澗鄰太守槃
撰聯云憶故鄉兩點金焦同斯佳境到此地一樓風月助我清談
戴公潤州人故上聯云爾

杭州湧金門外湖心亭俞蔭甫編脩撰楹帖云記故鄉亦有仙潭

看一樣湖光添得石橋長九曲至此地宜邀明月問誰家秋思吹
殘玉笛到三更宋莊景蘇閣懸偶語云紅杏領春風願不速客來
醉千日綠楊是煙水在小新隄上第三橋作者未及詢明三潭印
月之曲橋邊有某君題明月自來去空潭無古今之句殊覺渾成
安徽宣城太白樓李承謀撰偶句云大江淘盡英雄山經百戰樓
仍在詩卷長留天地人往千秋酒不空贛州府城東北有八境臺
覽羣山俯奔流景致佳妙何太守剛德題楹聯曰此亦岳陽大觀
誰其後先憂樂話到雙江流水毋忘伊洛淵源

師竹廬聯話卷一終

師竹廬聯話卷二

錫山拙翁寶鎮編輯

園林

海陵尤園柳村主人自撰聯曰十畝地無多不妨春酒留賓秋燈
課子半生天已定只向西郊學圃東郭催耕毘陵趙氏園楹帖作
者未詳句云樂志在田園問良友何人階下幾株松竹傳家惟誦
讀教佳兒底事窗前一榻琴書俱志趣高雅粲然可觀

金陵有楊園近亦著名有合歡樹兩本殆百年前物每屆花時士
女雲集內懸楹帖云置酒常招烏帽客到門先認馬櫻花又有偶
語云王謝舊烏衣喬木猶存大好樓臺欣得主邢隨今白地名園

無幾來遊士女任看花此兩聯薛慰農山長所題近聞友人言秦館
州姜堰鎮新築且圓落成王季徵撰偶句云杜來閣基址無存荒
涼二百餘年一壑一邱重整頓景山園雲祇有繼結構兩三間屋
半村半郭足棲遲又集句聯曰嘉葩美果列植而交蔭疏泉鑿石
關地以爲亭各有見長處

新安孫蓮叔有紅葉讀書樓卽其讀書處也樓凡三折人呼之曰
曲尺樓客至輒留宿其上德清俞蔭甫編修樾贈以聯云仙到應
迷有簾幙幾重闌干幾曲客來不速看落葉滿屋奇書滿牀蓮叔
又有小樓可觀日出署曰觀旭俞編修於甲辰歲曾宿其中適大
風竟夕遂題一聯云高吸紅霞最好五更看日出溥游黃海曾來
一夕聽風聲其故人馬讌香孝廉極賞之

蘇州漱碧山莊不知其爲誰氏之莊潘玉泉觀察題偶語云邱壑
在胸中看疊石疏泉有天然畫意園林甲吳下願攜琴載酒作人
外清游蘇州新修滄浪亭成應敏齋廉訪屬湖南某孝廉擬一聯
曰小子聽之濯足濯纓皆自取先生醉矣一邱一壑亦陶然九江
琵琶亭某孝廉曾撰聯曰燈影幢幢悽斷暗風吹雨夜荻花瑟瑟
魂銷明月纜船時組織元白本事頗自然此亭有舊聯云荻花楓
葉皆千古紅粉青衫彼一時亦才人之筆

吾邑西門外高氏祠堂後高松舟封翁建花園池橋亭閣布置合
宜花木亦盛亭內懸青松影裏天常寂翠竹林中月亦香之句閣

有聯云弱柳垂風荷帶露小軒臨水閣當山秦澹如都轉細業作館
又有聯曰池塘月撼芙蓉浪羅綺晴嬌滌水洲趙雲九大令起鵬
集唐人句而成迤北一里許有隨廬別墅在宏仁棧之後係華子
隨孝廉建築懸楹帖曰兩樹碧梧桐清簾疏簾無俗韻扁舟青簫
笠斜風細雨有良朋浣秋軒懸聯云曲檻秋風紅蓼岸小橋明月
綠楊隄靜頤小築一聯云新樣何妨參異域俗塵不到卽名山雙
梧閣下層有聯云更上一層樓天空地澗旁探千樹雪鳥語花香
皆族兄曉湘孝廉所著蓋兄與華君最交好也

金陵胡家花園在城西花盞岡明徐錦衣西園故址胡煦齋太守
奉母居此池館花石甲於白下以主人別號愚園故人又以愚園
呼之余於光緒丁酉偕友在此暢遊作偶語云花木滿芳園儘堪
邀月哦詩臨風把酒亭臺如畫景更有小巖蹲虎古柏蟠龍不過
就眼中所見畧寫一二莫友芝題此中無隱精舍有入座有情千
古月當窗無恙六朝山之句此中有曠觀亭江甯陳孝廉撰二聯
一係白下有山皆繞郭春城無處不飛花一係露白葭蒼伊人宛
在峯回路轉有亭翼然此亭懸包世臣聯云此地有崇山峻嶺茂
林修竹所至皆瓊樓瓏室瑤草琪花旁築春暉堂懸有數聯僅記
湘潭歐陽太守煙霞供養斯得上壽詩酒酣嬉能娛古歡及陽湖
趙太守慷慨宴笑留我嘉侶習靜獨處心思古以兩聯下通界花
橋有太湖趙觀察題白菡萏香初過雨碧琉璃水淨於風之句右

築課耕草堂灌叟題曰有地開鋤未忘塵世事此間閒話猶作太平聲當時諸老輩宦成歸隱其風致閒散可想

南通州水月閣俗名魁星樓亦是名勝處面對五山溪水環流遊者非舟不能渡張嗇庵先生大魁後改名果然亭歲乙卯於此處改設公園亭臺樓閣異於舊觀丁君月湖題鏡奩照檻一輪月筆架當門五朶雲及數點螺鬟綠楊陰裏一聲漁笛紅藕花中之句果然亭懸有聯曰畫檻欲凌雲風月無邊歸小閣錦標今奪得文章有價屬崇川南通州有顧某廿年司鐸牢落顛裘歸自太倉得城南習氏園葺而居之命曰借園結屋數十楹竹木陰翳怪石當庭曲徑迴廊位置楚楚一室圖書窗外並多野趣中懸楹帖云家計費經營一室安耕具一室安釣具世情資閱歷半日對古人半日對今人又有聯云如此丰神但須誦離騷飲美酒斯是陋室可以閱金經調素琴近日吾友自崇川歸談及此中有偶語云佳興四時同楊柳風梧桐月芭蕉雨橘柚煙芙蓉初日賞音千載共鸚鵡賦鷓鴣詩蛺蝶圖鳳凰曲蝌蚪古文均覺自然

錢塘袁子才太史築隨園於金陵清涼山下自題數聯僅記其二一爲舉頭望明月盪胸生層雲一爲春秋多佳日談笑無閒時又某君題隨園聯曰先生何許人也老子其猶龍乎蘇州山塘斟酌橋新修東陽張忠敏公祠其旁有屋數楹應敏齋廉訪署曰蒔紅小築癸酉秋俞蔭甫編修將有武林之行倚裝撰聯句云小築三



楹看淺碧垣牆淡紅池沼相逢一笑有袖中詩木襟上酒痕蓋因
此間泉石竹籬荷沼皆楚楚可觀最宜飲酒賦詩也

合肥張君祖翼於金陵冶山下闢地數畝倚山爲屋曰竹居境僻
景幽饒有園林山水之雅藏書萬卷其竹居讀書處柱懸立石白
成小五嶽披圖而觀大九州之句白門東花園中懸楹帖云忍把
浮名換却淺斟低唱若論能事短於擔糞彈棋不知何人所作張
欣之題西園聯曰居白門久無往非釣游足迹所經何須皖水皖
山常想像夢中風月於西城隅盡與其賢豪長者相契願趁好春
好夏同消磨醉裏光陰徐淮生於金陵臯園內止觀亭題聯曰水
抱孤城煙靄有無渾不辨窗開四面雨晴濃淡總相宜以上數聯
均有意趣浙江蘭溪縣南門某花園余撰偶句云幽地拓三弓拾
翠游人應駐屐春光饒四序看花閒吏此飛觴時余襄權蘭溪友
人屬題温州梅雨潭上有花木亭臺懸聯云飛瀑半天晴亦雨寒
潭終古夏如秋但撰者未能知

蘇州怡園主人顧子山先生文彬自題園林之聯胥用前人詞句
裁紅翦碧膾炙萬口其集蘇東坡詞作楹帖懸於園中云多景樓
中對酒卷簾邀明月曲水池上杖藜徐步轉斜陽又集東坡云步
翠麓崎嶇亂石穿空如對茂林修竹抱素琴獨向綺窗學弄何妨
低唱微吟集姜白石撰偶句云雙槳蕩波扇舟僅容居士一襟詩
思此地宜有詞仙其自題桂花亭聯曰喚個月兒來清光更多只

放冰壺一色從今花影下嬌黃成暈染教世界都香又聯曰淡酒
醉鴻濛看天濶鷺飛淵靜魚躍秋水見毫髮要小舟行釣曲岸持
觴此用辛稼軒詞又有聯云春到一分繡陌漸薰芳草橋通雙
紅波香泛浮萍續題聯云巧石盤松細草靜搖春碧垂楊梳雨長
絲初染柔黃此用吳夢窗詞子山先生集詞句所撰各對幾如韓
信將兵多多益善茲因限於篇幅僅錄百中之五六焉

海上半淞園梅君豫根題楹帖云彈指感滄桑遙看燈火樓臺且
來尋一角園林話大帝殘碑將軍古壘撐腸富丘壑最好谿山罨
畫更添得四時風景有龍華塔影歇浦潮聲又有一聯作者未詳
句云登起一房山大好園林最難得茅屋沾春竹綠消夏翦取半
江水別開境界更時有車聲碾夢颿影催詩又聯曰綠樹四圍林
罨燈光照蛩語紅闌三面亭前酒夢囈秋吟邵君文錦題曲淵含
輕雨清軒秘曉霞之句方逋盦來遊作細雨春帆黃歇浦夕陽粉
本大癡山之句此園柱對均能侷儻不羣

如臯王琴夫觀察淡於榮利自浙任歸家於邑東之馬塘鎮小治
園林爲菟裘計丹徒趙君曾望爲撰楹帖曰羣賢畢至少長咸集
三徑就荒松菊猶存觀察後更營別業在村落間趙君復爲題句
於柱云羣賢畢至少長咸集五穀垂穎桑麻鋪芬上聯羨其廣交
賢俊故不覺與前同下聯指其地頗饒野趣也吾邑城西十餘里
有西山不甚高據巔遙瞰三萬六千頃波光帆影歷歷在目榮氏

白竹廬聯語 卷一
關園其上植梅數千本亭臺閣結構如畫內懸有千樹梅花
輪月萬家煙火一帆風及幾生修得到一半此勾留藏書何止
萬卷種樹須教四十圍等聯又某君題偶語云歷長廣溪曲曲
流一水迴環入室猶通香雪海與東西山遙遙對峙片帆時渡
船合載洞庭春園內書畫室掛一聯云風送暗香來幾輩動閣
詩興天空白雲淨數峯見江上青山俱有意趣

常州白龍庵水榭同治間由合肥李相國修建徧題楹聯示得意
蓋粵亂前讀書是中而復城由李手也近來屋傾圮由地方修復
隔岸關第二公園沿隄栽柳以爲斯樹之障孟心史兒時朝夕在
此盤桓落成後撰楹帖云煙柳倚關看高城日暮風景依然長與
釣遊留勝蹟滄桑隨燭轉舊壁紗籠題詞安在莫將裙屐換浮名
吾邑眇怡園爲顧氏別墅園內行和軒懸聯云團雪一叢碎霞萬
點凌雲百尺篩月半池園內柳風閣有聯云高樹半窗灑空翠遠
山一角含古青東鄉鵝湖華氏別業懸偶句云兩樹碧梧桐清簾
疏簾無俗韻扁舟青箬笠斜風細雨有良朋

宜興杜樊川水榭在縣城東關外面臨東汎汎水方廣九里南近
罨畫溪杜牧之客宜興時嘗寓此今大東門外杜橋相傳爲水榭
故址按牧之萬年人萬年爲樊噲所封地昔稱樊川人因號爲杜
樊川其水榭屢圯屢修潘伯彥有聯云禪榻常閒看裊裊茶煙隨
落花風去遠帆無數坐盈盈汎水從罨畫溪來上聯因杜詩有茶

煙輕颺落花風之句也

上海愚園景致頗佳朝夕遊人常盈室鄭海藏題楹帖云棠棣並
爲天下士舊迹不受人間羈出聯謂園主入柏生兄弟園內鳶飛
魚躍閣懸偶句曰怪石四隅危亭一角平橋六曲淺水三篙上海
辛園余未往遊聞友人言內有移石栽花種竹烹茶酌酒圍棋及
綠水自然成澗壑春風無日不山家兩聯又聞茅亭懸有一聯
云人民城郭是耶非把茅蓋頭看乾坤成毀林泉風月今猶昔拈
花彈指樂樓閣華嚴

湘中也可園有嵌字格一聯云也不設藩籬恐風月畏人拘束可
大開門戶就江山與我品題語頗清遠惜不知作者姓字廣州北
有快風閣四面虛敞所見無非丘隴揚州石天基撰楹帖云引我
舒懷山遠近催人行樂塚高低石君蓋自書其感抱而景色恰合
有天造地設之巧也楊椒山渡江訪唐荆川不值因登焦山碍月
亭題聯曰楊子懷人渡揚子椒山無意合焦山可謂工巧無倫
金陵城內西南隅有愚園爲胡煦齋太守別墅已摘錄數聯茲友
人談及劉彭之作能不欣然其清遠堂聯曰地近杏花村闌檻留
春瀟灑林泉新畫稿我來梅子雨琴樽消夏清涼世界小神仙係
劉省三撫軍銘傳題其曇碧含芳軒聯曰駿馬秋風薊北杏花春
雨江南係彭雪琴宮保玉麈題周海舫軍門卜宅金陵得陳氏僕
園葺而新之極一時花石之盛薛慰農山長撰偶語云百戰功成



從戟門牙帳而來謝萬戶侯封貪看六朝山色十弓地拓極石磴
雲關之勝問汾陽聲伎何如居士清涼又撰楹帖懸其喧谷云花
塢藏春竹爐暖酒紅羅宴客白紵徵歌並題聯於其水流雲在堂
句云魚鳥清閒作濠濮間想竹石奇古如魏晉時人隨園老人之
別墅在清涼山麓今則鞠爲茂草矣相傳園中有一聯云柴米油
鹽醬醋茶煙除却神仙少不得孝悌忠信禮義廉恥沒有銅錢可
做來見道語深雋有味其自題聯云讀書已過五千卷此墨足支
三十年意太豪縱不免爲人指摘耳

南通州城南顧氏借園柱懸偶句曰奉胡安定教條經師南面經
生北面仿陸平原故事阿兄東頭阿弟西頭亭內懸聯曰宜飲酒
宜圍棋水木明瑟請學稼請學圃冬夏播琴張退庵先生營城南
別業成自題其門有不作夔龍佐聊同燕雀春之句其弟晉庵先
生集唐句爲楹帖云舍南舍北皆春水山鳥山花吾友于又聯云
入水不濡入火不爇與子言孝與父言慈蘇州顧子山先生築園
曰怡園樓閣亭榭池石花木景甚清幽遠近遊人畢集曲闌處懸
偶語云彈壓萬貔貅笳鼓歸來正堪翦竹尋泉和雲種樹往還一
丘壑闌干拍徧只是看花索句采菊題詩樓有聯云睡覺北窗涼
缺月初弓好夢未成鶯喚起木末翠樓出清風舊築去年曾共燕
經營又聯曰獨倚小闌干落日蒼茫我見青山多娥媚正在一丘
壑浮雲來去只今明月費招邀亭中聯云鷄曉鐘昏萬卷詩書事

業潭空水冷一天星斗文章

南京愚園有梅庵楊君文瑩題偶語云梅花萬樹密室先春諸老
林間圖雅集瘦鶴一聲長天欲雪昨宵枕上夢孤山園中更有稱
又一村者李文忠撰楹帖曰山椒雲氣易爲雨村落人家總入詩
有稱西圃者侯官林內翰惠臻作聯曰紅黃霜樹珊瑚海黑白雲
華玳瑁天春睡軒中灌叟題四言對云故燒高燭乞借春陰松韻
館中有一窗蘿月禁春瘦萬壑松風撼晝眠之聯係吳縣王亦曾
太史手筆清遠堂內有詩文清芬曰道德會山川靈秀入戶庭間
之聯係高要馮中丞譽驥手筆相傳此園樓柱舊有一聯句云百
尺曠襟懷更看翠袖連雲香車流水四時供嘯傲最好夕陽西墜

明月東升此園聯語各具風趣

常熟彭家場趙園創始雍正時後咸同間有趙惠甫者觀察江西
歸田後手加修葺於此讀書靜養近年園漸傾圮未免荒寂景象
有亭額曰延爽懸偶句云亭影欲隨葭葦活鏡光不礙鷺鷥藏俞
蔭甫編修爲惠甫觀察題數里外有嚴氏別業明嘉靖時大學士
謚文靖名訥所營今改逍遙游佔山麓之勝舍宇曲折奧衍文窗
綺寮雅潔無纖塵後倚山前瞰湖四時嘉景天然入畫舍後隨山
高下繞以竹籬籬外徧種秋花額曰娛樂廣場柱懸聯曰夕陽樓
閣煙雨亭臺眼前風景不殊烏目山人新粉木西麓壯觀南華化
景額上題名如故白頭相國舊書堂又聯云晴翠撲人四面軒窗



宜小坐夕陽流水兩湖風月此平分寫景恰合又邑紳錢侍御汝
載築小園曰劍閣當時自題楹帖云無邊風月供嘲弄有主江山
屬剪裁今聯猶流傳人口而閣久廢矣

吾邑公園於光緒三十一年乙巳春就洞虛宮荒基經始開闢名
錫金公花園後數年向秦氏以明季盛冰壑別業之基地購歸由
是基漸擴充而構造亦日新月盛即改今名全園黃沙爲路綠草
爲場入門巨石巍峙最高者爲繡衣峯其北做軒一間顏曰西社
前面之池通白水蕩池畔築軒三楹曰池上草堂附近有清風茶
墅園之中心建多壽樓後有小池前有露臺西邊草場花架中有
茅亭又有八角六角四角等亭布置其間土墩一丈樹狀若華蓋

覆於其上名其地曰歸雲塢斯園之景遊目騁懷信可樂也多壽
樓懸華君文川所撰楹帖云園成公界當具公心望遊人護花繫
鈴務使長春不老樓以壽名允宜壽世願來者紀籌延算同爲大
陸真仙此樓發始於宣統元年華海初大令華子隨孝廉吳俊夫
封翁均以年七十倡節壽筵之資捐助建築樂與人同甚足欽慕
戊午六月市公所於樓前添築露臺尤可望遠又懸秦君寶瓊撰
聯云勝地起層樓水色山光摩詰畫名園鄰古寺夕陽芳草少陵
詩丁君寶書題偶語於池上草堂云可以息可以遊商畧廿年真
始願不及此何處池何處堂蒼茫四顧起古人而問之上聯指同
人欲擇地爲公園在光緒乙巳以前已廿載當計畫之始不料遽



有今日下聯指池以上無頽垣敗屋可認今建斯堂仍顏舊額不
識於古址地位若何吳君觀岱於歸雲塢題集句云老樹不知歲
名園別有天曹君銓於清風茶墅撰楹句云復後樂園舊觀奇花
四照疏柳兩行小墅清風遺闕莽訪洞虛宮遺跡青笠人來紫
仙杳曲廊斜月好尋詩明盛中丞顒取白水蕩以營後樂園中
清風茶墅爲子弟羣從鬪莽處其地卽今公園之靠東元王梧溪
在洞虛宮玩月作詩其地卽今公園之靠西址毗連也

揚州某氏園懸楹帖云坐客爲誰聽二分明月簫聲依稀杜牧主
人休問有一管春風詞筆點綴揚州作者未及詢明惠山寄暢園
明正德中秦端敏金并二僧舍曰南隱漚寓者爲之初名鳳谷行

窩中多古木後倚一墩端敏歿歸其族後裔燿乃易今名其後或
分或合或改築累石作層巒又引二泉之流曲注其中成而景益
勝康熙乾隆間御駕南巡輒幸於茲宸翰稠疊自端敏至今四五
百年未嘗易姓他園皆廢惟此獨存爲吾邑著名園墅聞舊懸楹
帖甚多今僅有池邊知魚檻內二聯裔孫寶瓚聯曰荇藻潏洄三
面波光搖素壁樹林陰翳半園山色上朱闌翁文恭同龢聯曰池
含林采明於纈石貼苔華媚若鈿餘無見蓋燬未補立耳

杭州西湖彭公退省菴懸偶語云退食有餘閒當載酒人來莫辜
負萬頃波光四圍山色臨流無俗慮看採蓮船去始聽得一聲漁
唱幾處疏鐘未知撰者姓名靈隱寺西舊有包氏北莊臺榭之美



冠絕一時後爲翰林學士湯右曾別業改稱湯莊自題楹帖云連峰紫翠看皆好喬木風煙畫不如秣陵聚寶門外雨花臺據岡阜高處遙瞰大江俯臨城市爲金陵扼要之地相傳梁武帝特有法師講經於此感天雨花故名今其上築亭及茶室旁植花木儼是小小園林亦有第二泉味平平遠遜惠泉之甘冽許中丞振禕題聯云獨攜天上小團月來試人間第二泉集蘇句頗能諧妙

師竹廬聯話卷二終





中国国家图书馆
NATIONAL LIBRARY OF CHINA